

San Pablo Timoteo'te charo chu'o tocha saosi'ea'me

Chu'o saosi'ea'me

¹⁻² Dios maire vati toa uuche Ûsekaikuji chũ'umuna chu'u, Pablo, Maire Paaku Jesucristo saosi'kupi mu'ure Timoteo'te ija'ova utija'ova tocha saomu. Chu'upi chu'vakuna Dios chu'o asa chẽa Jesure cuasaku jovosi'kujeku chu'u chĩija'iu pa'iku'mu mu'u. Mai Ja'ku Diona'me Maire Paaku Jesucristo mai pojoju cha'ache Īsijapi oiu rua re'oja'che pa'iche'te cho'okau mu'ure, re'oja'che paau chini.

Jorechu'o che'choũseche'te kuamu

³ Chu'u icheja Macedonia cheja raipi'rarumu mu'ure cho'oa'ku chini chũ'u jo'kasi'ere ũcua cho'oku paau chini jo'e chũ'umu chu'u mu'ure, ũcuachejare Efeso vu'ejoopo'te saima'ñe pa'iu jorechu'o che'chona che'choche'te ũseku paau chini. ⁴ Jã'aja'ñe cho'oku repanare cuhama'ñe ũcua i'kaku pa'ijũ'u, repanapi aichu'ona'me aipã pa'isi'e cuhama'ñe si'arumu cutuju pa'iche'te jo'kasoaju. Jã'aja'ñe cutuju sãinechi'a ke'reme. Dios cho'okaiche jã'aja'ñe cutucheji asa chẽa cuasaju jovoma'me Jesure.

⁵ Repanapi pãire chekunani ña oiju re'oja'che cho'okaiju paapu chini jã'aja'ñe chũ'umu chu'u. Pãi repana rekoñoã cu'achejẽ'e cuasama'ñe cu'ache cho'omanajeju suma'ñe pa'imana Dioni masi cuasaju chekunare pãi oimasime. ⁶ Mu'u pa'icheja pa'ina te'ena jã'aja'ñe re'oja'che pa'iche'te cavesuso peoche cutuchu'ore asaju pa'ime. ⁷ Dios chũ'u jo'kasi'e

che'choñu chiinata'ni repa chũ'usi'e kuachu'o asavesume repana. Ruu masiche cuasoche cutunata'ni vesume repana.

⁸ Iere masime mai: Dios chũ'usi'e re'oja'imu. Jã'ata'ni Repa cho'ora chini chũ'u jo'kasi'e masiche pa'imu. ⁹ Re'oja'che pa'inani chũ'uku jo'kasi'emamasomu jã'a. Ija'che cho'onapi repana cu'ache cho'oche'te cuasa masi jo'e cho'omanea'ju chini jo'kasi'easomu: Repa chũ'usi'e jachanana'me chũ'unare cuhenare, Diore cuhenana'me cu'ache cho'onare, Diore vajuchumapu Repa'te pojomajñaruã cho'ocuhenare, puka'kupã vanisonana'me chekunare vanisonare, ¹⁰ rñjoromi peonare romineenana'me ñjupã peonare umuneena, umupã ñcuajanare umuneenana'me romi ñcuajanare romineenare, pã ñcuajanare chẽa kuripi ñsisonare, jorechu'o cutunana'me pã chẽañe chũ'unare roiju jorenana'me cheke si'ache cu'ache cho'uju Dios chũ'ũne'te jachaju re'oja'che cho'ocuheju pa'inare. ¹¹ Jesucristo'te cuasache kuachu'o ñcuarepare jachame repana. Repachu'o Dios Re'oku chu'ure jo'kasi'ea'me chu'upi ku'iu chu'vaku paau chini.

Repa'te oiu Dios cho'okaisi'ere kuumu Pablo

¹² Chu'upi koka paaku Repa chu'ore chu'vaa'ku chini Maire Paaku Jesucristo chu'ure chẽa sao cho'okaimu. “Chu'u chũ'ũne masi cho'oja'mu iku”, chiiu Repa'ni cho'oche'te cho'okaa chini chu'ure chẽasi'kuam'u Repa. Jã'ajekuna, “Re'orepamu”, chiiu pa'iku'mu chu'u Repa'te. ¹³ Aperumu chu'u Repa'te Maire Paaku'te ruu cu'ache cutusi'kuam'u. Chu'uni teakuna Repa neenare ruu cu'ache cho'oku pa'isi'kuam'u chu'u, repanani cacu'ora chini. Jã'aja'ñe cho'oku'teta'ni Dios chu'ure oiu chẽasi'kuam'u,

Repauni cuasamau pa'ivesuku cho'okuna. ¹⁴ Jā'aja'ñe cho'o Maire Paaku Jesucristo chu'ure oi re'oja'che karama'ñe ĩsisi'kuam, chu'upi Repauni masi cuasaku pãire chekunani oi cho'okai paau chini.

¹⁵⁻¹⁶ Ie chu'o ũcuarepajekuna jachama'ñe cuasache pa'im mairi ũcuanukore: Jesucristo icheja cheja pãire, cu'ache cho'onani ũcuanukore jũni ro'ikasa chini raisi'kuam, mai cu'are Repaui jũni ro'ikakuna maipi vati toa saimana'ju chini. Jā'ajekuna Dios chu'ure te'eu chekunare ũcuanukore na'a ruu cu'ache cho'osi'kureta'ni oi Repaui Jesucristo jmamakarujẽ'e pe'ruma'ñe cha'aku pa'iche cho'o ñosi'kuam chekunare, Repauni cuasaju jovo Ũcuana'me ai pa'ijanare. ¹⁷ Jā'ajekuna Diore Peore Paaku'te Si'arumu Pa'ikuta'ni Ñoma'kure, "Peore Masiuji ruu re'okum mu'u", chiiju Repaui'techi'a Ũcuate'eu'te cuhama'ñe si'arumu pojoju pañu mai. Jā'aja'ñe paau.

¹⁸ Asarepajũ'u, chu'u chĩija'iu Timoteo. "Ija'che pa'ijũ'u", chiiu chu'vamu chu'u mu'ure: Dios chu'o kuana kuasi'ere ũcuarepa cho'oku cu'ache ti'jñetojẽ'e cu'are cava cajejani Jesure cuasache ũhasomanejũ'u.

¹⁹ Ũcuu masi cuasaku cu'ache cho'oma'ñe re'oja'che pa'ijũ'u. Chekuna te'ena re'oja'che cuasaju pa'iche'te jo'kaso cacu'asojũ pa'ime. ²⁰ Jā'aja'ñe cho'osinaa'me Himeneona'me Alejandro. Jā'ajekuna repanare vati aini jo'kasi'kuam chu'u, repanapi kuku Diore cu'ache i'kama'ñe pa'iche'te che'chea'ju chini.

Diore pojoche chu'vache'me

2

¹ Ie ruu chu'vamu chu'u mu'ure: Ũcuanukore pãi Dioni re'oja'chere sēekaiu, "Re'orepamu, Ja'ku", chiiu pa'ijũ'u Repaui'te. ² Maipi ainani, chũ'unani

ũcuanũkore Dioni s̃eekaiju pa'ito repana maire re'oja'che chũ'ũju pa'ivesache cho'omapuna Repaũ'te cuasache'te ũsecojñoma'ñe ũcua cuasaju re'oja'che pa'ijũ chekunare re'oja'che cho'okaiju pa'ijanaa'me mai. ³ Re'oja'chea'me jā'a. Dios maire vati toa sani uuche ũsekaikũ jā'aja'ñe re'oja'che s̃eekaiche asa pojomũ. ⁴ Repaũ Dios p̃ai ũcuanũkore Repaũ chu'o ũcuarepare asa ch̃ea Jesuni cuasaju jovo ũcuaũna'me ai paapu chiimũ. ⁵ Dios ũcuate'eũ'mũ. ũcuachi'a maire l'kakaikũ p̃aiũ ũcuate'eũ'mũ; Jesucristoa'mũ Repaũ. Jesucristochi'aa'mũ maire Diona'me re'oja'che paapu chini Cho'okaikũ. ⁶ Repaũ Jesucristo cho'okaicuhema'ñe maire p̃ai ũcuanũkore cu'a j̃uni ro'ikaisi'kua'mũ. Jā'aja'ñe cho'o Dios maire ũcuanũkore vati toa uuche ũsekasa chiiche cho'o ñosi'kua'mũ Repaũ, Dios chiisirumũjekuna. ⁷ Chu'ũ i'kache ie chu'o ũcuarepaa'me. Jorema'mũ chu'ũ. Dios chu'ũre Jesús saosi'kũre ũcuare kuaa'kũ chini chũ'ũ jo'kasi'kua'mũ, judío peonani Repaũ chu'ore ũcuarepa Repaũ'te cuasache kũachũ'ore che'chokũ ku'iu paapũ chini.

⁸ Jā'aja'ñejekuna p̃ai si'achejña pa'inare, cu'ache cho'oma'ñe pa'ijũ, chekunare ke'reju pe'ruma'ñe re'oja'che pa'ijũ Dioni s̃eeju pa'ijũ'ũ, chiimũ chu'ũ. ⁹⁻¹⁰ Romire ija'che chu'vamũ chu'ũ: Romi re'oja'che pañu chiina kãña re'ojakãña ju'icheji re'oja'che ñoñechi'a cuasama'ñe rekoñoã pa'iche'te na'a r̃ua cuasaju pa'ijũ'ũ. Pe'kerũ pa'ijũ musanũkona rekoñoãpi masi cuasaju re'oja'che cho'ojũ pa'ijũ'ũ; romi Diore cuasana pa'iche'me jā'a. Jā'aja'ñe cho'ojũ pa'ina repana rekoñoãpi re'oja'che pa'iche cho'o ñome. P̃ai pi musanũkonani chiapu chini raña si'ache r̃uarepa veni care'va, kãña r̃ua ro'ikãñana'me ko'siũa, pachokuri

cho'osimajñarũ ju'ijũ pa'imanejũ'ũ. Ũcuachi'a umũpãipi uache ñaa'ju chini ju'ijũ pa'imanejũ'ũ. ¹¹ Pã Dioni pojoñu chini chi'irumũ umũpã ña kukujũ pa'ijũ cutuma'ñe Dios chu'ore asa chëaju pa'ijũ'ũ. ¹² Romipi umũpãire chũ'ujũ che'chojũ i'kama'ñe pa'ijũ'ũ, chiimũ chu'ũ. ¹³ Ija'chea'me: Dios aperumũ Adanni charo cho'oasomũ, na'a cho'jena Evare. ¹⁴ Repanare cho'osirumũ Eva Dios chũ'usi'ere jachako re'oja'chere cho'ovesuko vatipi jorekũ chũ'ũna asa chëa charo cu'ache cho'oasomo. Repao ñjũ Adán vati jorekũ chũ'ũñe, “Ũcuarepama'mũ ie”, chiiũ masakũta'ni ũcua cho'oasomũ. ¹⁵ Aperumũ pa'isi'ko jã'aja'ñe cho'osi'eta'ni musanũkona romi Dioni masi cuasajũ, chekunare oijũ re'oja'che cho'okajũ pa'ijũ, cu'ache cho'oma'ñe re'oja'che pa'imasijũ chĩire masi paato re'oja'che pa'ija'mũ musanũkonare.

Jesure cuasakuanupũ chũ'ũna pa'iche'te kũamũ

3

¹ Ie chu'o ũcuarepaa'me: Pãũ ũcuauakujĩ Jesure cuasakuanupũ chũ'ũkũ pasa chiito rũa re'omũ. ² Jã'ata'ni repanare chũ'ũkũ re'oja'che pa'imasia'kũ, pãipi repaũni ñajũ i'kamanea'ju chini. Rũjore ũcuate'eo'te paaa'kũ. Masi cuasakũ cu'are javokũ re'oja'che pa'iu pã ña kukucojñokũ paaũ. Ũcuachi'a pã so'ña rainare si'arumũ tijña repaũ vu'ena cuaa kuirakũ ãũ aukũ kãñejatũ'ka jo'kakũ paaũ. Ũcuachi'a Dios chu'o che'chomasikũ paaũ. ³ Conore jũ'iu cavakũ pa'imanea'kũ. Pe'kerũ pa'iu ke'rema'ñe, kurineekũ pa'imanea'kũ. ⁴ Repaũ vu'e pa'inare masi paaa'kũ. Ũcuachi'a mamachĩ repaũ'te ña kukujũ repaũ chũ'ũñe jachama'ñe cho'onare paaa'kũ. ⁵ Pãũ repaũ vu'e

pa'inare chũ'avesukũ Diore cuasakuanupũ, ¿je'se chũ'ujau'ũ? ⁶ Ūcuachi'a Jesure cuasanare chũ'ujau Repau'te apecuasakũ jivosi'kupi pa'imanea'kũ, chekurũmũ repau pa'iche'te ruarepa meñe cuasakũ pojokũ vati ai ti'jñecoñosi'eja'che ti'jñecoñokũ. ⁷ Ūcuachi'a Jesure cuasamana ña kukũ re'oja'che cutucojñokũ paau, pãipi repaũni ke'rejũna sãĩne pe'rukũ vatini cacũ'ocojñokũ.

Repakuanupũã chũ'unare cho'okaina pa'iche'te kũamũ

⁸ Repakuanupũã chũ'unare cho'okaina ũcuachi'a pãi chekũna ña, vajũchũcojñona paapũ. Repana i'kache chũ'o jmakarũjẽ'e jorema'ñe paapũ. Cononeema'ñe paapũ. Ūcuachi'a jorejũ kuri kooñũ chiimana paapũ. ⁹ Dios chũ'o mai cuasache ũcuarepare cuhasoma'ñe cuasajũ paapũ. Cu'ache cho'omanajejũ oima'ñe paapũ. ¹⁰ Repanare chũ'unare cho'okaiche jo'kara chini charo repana pa'iche'te ruajeerũmũ ñaĩne chiimũ. Repanapi re'oja'che pa'ito jã'aja'ñe cho'oche jo'kare'omũ repanare. ¹¹ Repana rũjoromi ũcuaja'che chekũnare cu'ache cutuma'ñe pe'kerũ pa'ijũ, cononeema'ñe pa'ijũ, repana cho'oche peore masi cho'oju, pãi chekũnare ña kukũcojñona paapũ. ¹² Jesure cuasana chũ'unare cho'okaikũ rũjore ũcuate'eo'te paaa'kũ. Ūcuachi'a repau mamachii re'oja'che masi chũ'ukũ repau vũ'e pa'inare ũcuanukore masi paa'kũ. ¹³ Repana chũ'unare cho'okaina repana cho'oche chekũnare masi kuirani ruã ña kukũcojñojanaa'me. Ūcuachi'a repana Jesure cuasache kũavajũchũma'ñe chekũnare kũajanaa'me.

Dios kũasi'e mai cuasachũ'o ũcuarepa pa'iche'te kũamũ

14-15 Na'mi sani ñara chiimũ chũ'ũ mũ'ũre. Jã'ata'ni chekurũmũ saicu'akũna chũ'ũpi pesa saima'to mũ'ũpi masia'kũ chini ija'ova utija'ova Dios neena pa'iche che'choche'te mũ'ũni chũ'vakũ tocha saomũ chũ'ũ, mũ'ũpi repacheja pa'inani che'choa'kũ chini. Repana Diore Si'arũmũ Pa'ikũ'te cuasakuanupũ Repaũ chũ'o chekunani kũajũ paapũ chini Ũcuajũ cho'okaiũna asa cuasanaa'me. ¹⁶ Diore ja'me pa'ire'oche'te Repaũ kũamanesi'ere churana Ũcuajũ kũaũna mai asa chẽa cuasachũ'o ũcuarepajekũ rũa re'oja'imũ. Ija'che cuasanaa'me mai:

Icheja chejare pã ca'nivũ paakũ rani paniasomũ Cristo. Dios Rekochoji cho'okaiũna Repaũ cu'achejẽ'e cho'oma'ñe pa'iche ñaasome pã.

Angeles ũcuachi'a Repaũ cho'oche ñajũ paniasome.

Repaũ pa'iche si'avãjũpãire kũakaisi'ejekũna pã si'achejña pa'ina cuasame Repaũ'te.

Cheja pani pi'ni Dios pa'ichejana cũnaũmũna jo'e mũ'nisoasomũ Repaũ.

Jesure cuasache jo'kasona pa'iche'te kũamũ

4

¹ Jã'ata'ni Dios Rekochoji masi kũaũna ie masime mai: Cristo chuta'a raimarũmũ Repaũ'te cuasana pã te'ena Repaũ'te cuasache ũhaso vatipi chũ'ũkũna pã jorena che'chochũ'ore asa chẽa cuasajũ pa'ijanaa'me.

² Sẽ'sevũchi'a re'oja'cheja'che ñoñe pa'ijũ jorena chũ'ore asa jachama'ñe cho'ojũ pa'ijanaa'me repana. Repana jorena cu'ache cho'ojũ che'chesosinajejũ repanani cuasomaũna repana cu'ache cho'oche oimanaa'me.

³ Repana jorena romi vejache ãseme. Ũcuachi'a ãu te'emajñarũã ãiũseme repana. Repa ãu Dios cho'osi'ea'me, Repaũ'te cuasanapi chũ'o ũcuarepare

masijũ Repañũ, “Re'orepañũ, Ja'kũ”, chiiju ãiju paapu chini. ⁴ Æu Dios cho'osimajñarũã peore re'oja'chea'me. Jã'ajekũna ãimajñarũã ũcuamamajñarũãre jñaani cuhema'ñe pojojũ, “Re'orepañũ, Ja'kũ”, chiiju ãire'omu maire. ⁵ Jã'ajekũna Dios, “Re'omu ie”, chiisi'ere ãure maipi ũcuani sãejũna ïsikũna jñaã ãito re'omu.

Jesucristo chũ'ũ ñe masi cho'okaina pa'iche'te kuamu

⁶ Mu'ũ cuasaku pa'iche'te Dios chu'o ũcuarepare Repañ'te cuasache kuachu'ore si'arumu ñaku che'cheku mai majapãijanani jã'are che'choku pani Jesucristo'te cho'оче masi cho'okaiku pa'ija'mũ.

⁷ Jã'ata'ni aichu'o pãĩ cuasache jorechu'o Dios chu'oma'ñe asacuheku cho'oma'ñe pa'iu Dios chiihechi'a si'arumu na'a ruu cho'oku che'cheku pa'ijũ'ũ. ⁸ Mai ca'nivũãpi koka peoca'nivũã pa'imanea'ku chini, cho'оче'te ruu cho'oto re'omu. Jã'ata'ni rekocho pa'iche Diore cuasaju cho'оче'te na'a ruu cuasaku pa'ijũ'ũ. Jã'aja'ñe cho'oto icheja cheja pa'irumuchi'a re'oma'ñe jũnisosirumujatũ'ka re'oja'mũ maire. ⁹ ũcuarepaa'me jã'a. Pãipi ũcuanũko jã'are cuasato re'omu. ¹⁰ Jã'aja'ñejekũna pãipi ũcuare cuasaa'ju chini, Diore Si'arumu Pa'iku'te maire re'oja'che cho'okaijachere cha'aju pojojũ Repañ'te cho'оче ruu cho'okaiju pa'inaa'me mai. Repañ pãĩ ũcuanũkore vati toa sani uuche ũsekaimasiku'mũ. Jã'ata'ni Repañ'te cuasanarechi'a uuche ũsekaiku'mũ.

¹¹ Ie chu'o chu'ũ mu'ũre chu'vache repacheja pa'inare chũ'ũku che'choku pa'ijũ'ũ, peore masi cho'oju paapu. ¹² Repanare Jesure cuasanare re'oja'che i'kaku pa'ijũ'ũ. ũcuachi'a mu'ũ re'oja'che pa'iu Diore masi cuasaku cu'achejẽ'e cho'oma'ñe pa'iu chekunare oiũ re'oja'che cho'okaiũ pa'iche cho'o ñojũ'ũ repanare, ña chẽã

ũcuaja'che cho'oju paapu chini. Mu'upi jã'aja'ñe cho'oto pōsum'teta'ni mu'ure ña kukuju pa'ijanaa'me repana. ¹³ Chu'u mu'u pa'icheja sairumujatu'ka repanare si'arumu Dios chu'o tocha jo'kasi'e repana ũcuanuko asaju'te ñaku chu'vaku che'choku pa'ijũ'u. ¹⁴ Jesure cuasana aina mu'ure jũjñapi jajuna Dios Rekocho mu'ure jo'kasi'e chekunare cho'okaimasiche cuhasoma'ñe cho'oku pa'ijũ'u.

¹⁵ Chu'u mu'ure chu'vachu'o cho'o ca'nasoma'ñe peore masi cho'oku pa'ijũ'u, pãipi ũcuanuko mu'u si'arumu na'a re'oja'che pa'iche'te ñaju paapu. ¹⁶ Ñarepak re'oja'che pa'iu masi che'choku pa'ijũ'u. Mu'upi jã'aja'ñe ũhasoma'ñe re'oja'che cho'oku pa'ito Diopi ru'a re'oja'che cho'okaija'mu mu'ure, mu'u che'chonare ũcuachi'a.

Jesure cuasanare kuiraju chũ'uñe'te kumam

5

¹ Umupã mu'ure na'a ru'a ainarejẽ'e ke'rema'ñe mja'kupãijanare pe'keru i'kaku chu'vaku pa'ijũ'u. Pōsupãire mche'uchĩijanare re'oja'che che'choku pa'ijũ'u. ² Romi mu'ure na'a ru'a ainare mja'koromijanare chu'vaku pa'ijũ'u. Romichĩi mche'oromijanare cu'ache cho'oma'ñe pa'iu re'oja'che che'choku pa'ijũ'u.

³ Va'jeva'nare kuiranare peonare ña oiu kuiraku pa'ijũ'u. ⁴ Jã'ata'ni va'jeva'ore chĩi paako'te repao chĩipi kuiraa'ju. Chĩi peokoji majanajechĩi'chi'a paako'te ũcuanapi kuiraa'ju repao'te. ũcuachi'a Dioni masi cuasaju re'oja'che cho'oche'te che'che puka'kupã repanare oiju re'oja'che kuirasi'eja'che repana majapãire sãñe kuirato pojomu Dios. ⁵ Va'jeva'o te'eo pa'io chova'o pa'iva'o Dioni cuasako Repau cho'okaijachere

pojoko cha'ako umucujñana'me ñami Repa^uni si'ar^um^u cuhama'ñe sēeo pa'imo. Jā'aja'ñe pa'iva'nani cho'okañu chiime mai. ⁶ Jā'ata'ni chek^una va'jeva'na repanare ^uachechi'a ũcu^uache cu'ache cho'o^{ju} pa'ina vaj^unata'ni repana rekoñoã jūnisosinaja'ñe pa'ime. Jā'aja'ñe pa'inare cho'okaicuheme mai. ⁷ Ūcuachi'a repacheja pa'inare majapāi kuirache'te che'choj^ũ'^u, re'oja'che pa'ij^una chek^unare repana pa'iche'te ñaj^u cu'ache cutucu'aa'k^u. ⁸ Mai majapāi kuirache pa'im^u maire. Na'a so'o majapāijē'e cuasaj^u ũcuate'eko'a pa'inare majapāirepa na'a r^ua cuasaj^u kuirache pa'im^u maire. Jā'aja'ñe cho'omaneni Diore cuasana pa'iche pa'imanajej^u Repa^u'te cuasamanare na'a r^ua cu'ache cho'ome mai.

⁹ Jesure cuasakuanup^u kuiracojñojanare va'jeva'nare ija'che pa'inarechi'a repana mami tochaj^ũ'^u: Ūj^upāi ũcuate'enare pa'isinapi sesentarepa^ũs^ur^um^u na'a r^ua paanarechi'a. ¹⁰ Ūcuachi'a re'oja'che cho'o ñoj^u pa'ina paap^u: Mamachīi re'oja'che jojasina paap^u, repana v^u'ña rainare pāi poj^u re'oja'che cho'o^{ju} pa'ina paap^u, Jesure cuasanare re'oja'che cho'okaij^u pa'ina, ch^uova'na pa'inare re'oja'che cho'okaij^u pa'ina, re'oja'che si'ache peore cho'ona paap^u.

¹¹ Jā'ata'ni va'jenare na'a romichīi mami tochamanej^ũ'^u. Chek^ur^um^u repanare ^uache'te cho'o^{ju} jo'e ^um^u vejaso repana Jesucristo'te cho'okaiche'te jo'kasoj^u. ¹² Jā'aja'ñe cho'oni repana cho'ojanaa'me chiisi'ere jorej^u cho'omaneni cu'ache cho'ome. ¹³ Ūcuachi'a repana va'jena na'a romichīi si'ar^um^u ku'ichechi'a pa'ij^u chek^unani pāire cu'ache cutuj^u ñamena carūniso Jesure cuasana i'kama'ñere i'kaj^u pa'inaa'me. ¹⁴ Jā'ajek^una va'jenare na'a romichīi jo'e ^um^u veja chīi paaj^u v^u'e kuirana paap^u, chiim^u ch^u'^u,

maire cuhenapi repanani cu'ache cutumanea'ju chini.
¹⁵ Chekuna va'jeva'na te'ena Jesure cuasache jo'kaso vati
 ai chũ'ũñe'te cho'oju pa'ime.

¹⁶ Romio ũcuauako Jesure cuasakoji repao majapãire
 va'jeva'nare paani kuirako paa, Jesure cuasakuanupũ
 pa'inani ruarepa kuirache chiimanea'ku. Jã'aja'ñe
 cho'oto repanare Jesure cuasakuanupũ pa'inare
 va'jeva'nare kuirare'oja'mũ, kuiranare peonare.

¹⁷ Jesure cuasana aina chekunare masi chũ'ũju
 kuirana repana chũ'ũnare ruu re'oja'che pojocojñoju
 paapũ. Repanapi Dios chu'o si'arũmũ che'choju
 chu'vana pani na'a re'oja'che cho'okaicojñoa'ju. ¹⁸ Dios
 chu'o aperũmũ tocha jo'kasi'e ũcuare ija'che kuamũ:

Vacare trigo cha'ca po'tekaiku'te trigo ãiũsemanejũ'ũ;
 ãiũ cho'oa'ku,
 chiimũ. Cheku'cheja ija'che kuamũ:
 Cho'oche cho'okaiku'te repaũ cho'oche cho'osi'e ro'i
 ro'ijũ'ũ,
 chiimũ.

¹⁹ Pãipi Jesure cuasana chũ'ũnani, "Cu'ache
 cho'osinaa'me ina", chiito jachajũ'ũ, chekunapi repana
 cu'ache cho'osi'e ñasi'ere chotena jã'apãani ka'chana
 ũcuate'e kuama'to.

²⁰ Cu'ache cho'oreparu jo'e cho'omanea'ju chini pã
 ũcuauako asaju'te i'kajũ'ũ repanare, chekunapi asa
 kuku repana cho'osi'ejache cho'omanea'ju chini.

²¹ Ie chu'o mu'ũpi asa cho'oa'ku chini Diona'me
 Jesucristo Repaũ chẽa paacojñoa'ũ angeles asaju'te chũ'ũ
 jo'kamũ chu'ũ mu'ũre: Chu'ũ chu'vache cho'oku mu'ũ
 chiinarechi'a na'a re'oja'che cho'okaiũ pa'ima'ñe pã
 ũcuauakore ũcuapa'ruvachi'a oiũ cho'okaiũ pa'ijũ'ũ.

²² Chũ'ũnare jo'kara chini repana pa'iche mu'ũ ruu
 jeerũmũ ñasinani jo'kajũ'ũ. Repana pa'iche mu'ũ

masi ñamanare chũ'uñe jo'kamanejũ'u, chekurumu repanapi cu'ache cho'ojuna ña pãipi mu'uni cu'ache cutujũ. Jmamakarũjẽ'e cu'ache cho'oma'ñe pa'iu re'oja'che pa'ijũ'u mu'u.

²³ Timoteo, mu'uni chu'vamu chu'u ie: Mu'u te'eñoã cutaro jũni okorepachi'a ũkuku pa'ima'ñe uche conopi jmara'karũ ja'me ũkuku pa'ijũ'u.

²⁴ Jo'e chũ'unare jo'kache'te i'kamũ chu'u. Rua jeerumu ñasinarechi'a jo'kato rua re'omu, chiimu chu'u. Irumũ pãi te'ena cu'ache cho'oche ñomu, pãi ũcuanũko cho'osi'e ro'iche Dios chũ'umucuse chuta'a tĩ'amarumuna. Jã'ata'ni chekuna ñoma'ñe cu'ache cho'oche pãi ũcuanũko cho'osi'e ro'iche Dios chũ'umucuse ũcuauji kuuna masijanaa'me pãi.

²⁵ Ũcuaja'che pãi re'oja'che cho'oche te'eñoã pãi ũcuanũkore masi ñomu. Jã'ata'ni te'eñoã ñoma'ñe re'oja'che cho'oche pãi ũcuanũko cho'osi'e ro'iche Dios chũ'umucusenena masicojñoja'mũ.

6

¹ Chekunare chẽa paacojñoñapi Jesure cuasana repanare paanare ña, vajuchũju jachama'ñe paaru, pãipi repana pa'iche'te ña mai che'chochu'ore asa, "Cu'amũ jã'a", chiiju Dioni cu'ache cutumanea'ju chini.

² Chẽa paacojñoñapi Diore cuasana te'ena repanare paanapi ũcuaja'che Jesure cuasana pa'ito repana majapãijanajejuna na'a jmamakarũ ña, vajuchũju pa'ima'ñe cho'oche na'a re'oja'che cho'okaiju paaru, cho'okaicojñoñapi repana cuasana majapãijanajejuna. Ie che'choku chũ'ũku pa'ijũ'u repacheja pa'inare:

Re'oja'che pa'iche'te kuamu

³ Pãiu ũcuaukuji Maire Paaku che'chosi'e ũcuarepare jachaku, Diore masi cuasaju pa'iche'te kuachu'o

che'choma'ñe jorechu'ore che'choni cu'ache cho'omu.
⁴ Repauji meñe, “Rua masiu'mu chu'u”, chiiu cuasaku
 Dios chu'o ũcuarepare asacuheku rua vesuu'mu repau.
 Pāi sāiñechi'a cutuju ke'rechu'ochi'a ũcuarepama'ñere
 asaku cutumu repau. Jā'aja'ñe cutuna pāi chekunare
 ña pojoma'ñe cavaju cu'ache i'kaju sāiñechi'a jore-
 naa'me. ⁵ Cuhama'ñe cavaju cu'ache cuasanajeju
 chu'o ũcuarepa cuasamanaa'me repau. Kurire kooñu
 chini Dios chu'oja'che i'kaju repau cuasachechi'a
 chu'vanaa'me repau. ⁶ Jā'ata'ni pāi Dioni masi cuasaju
 repau paanukoruchi'a paaju pojoju na'a rua paanee-
 mana kurina karama'ñe paacheja'che repau rekoñoã
 re'oja'chere paame. ⁷ Mai pāi ũcuanuko icheja cheja
 rairumu cu'amajñaruuãjẽ'e peona raisinaa'me. Ūcuachi'a
 mai jūnisorumu sacu'akuna peova'na saijanaa'me mai.
⁸ Jā'ajekuna maini āiñena'me kãña karama'to, ũcu
 jā'ajamakaru paaju pojoju na'a rua paaneemaneñu mai.
⁹ Pāi kurina pañu chiina pa'ivesuju cu'ache cuasaju vati
 chu'uñe'te asa chẽa repaure uache'te cho'oju ũcu-
 napi meñe cu'ache cho'oju cacu'a cho'osoju pa'ime.
¹⁰ Kurineena si'ache rua cu'ache cho'ome kurire kooñu
 chini. Pāi te'ena kurire ruarepa chiiu Jesure cuasache
 jo'kaso re'oja'che pa'iche'te cavesuso cu'ache pa'iju rua
 chuova'na pa'ime.

Re'oja'che pa'imasiche'te kuamu

¹¹ Mu'uta'ni Dios neekujeku jā'aja'ñe cho'ocuheku
 cho'oma'ñe Repauni masi cuasaku pojoku pe'keru pa'iu
 Repau chiiche'te cho'oku chekunani oiu re'oja'che
 cho'okaiu, cu'ache ti'jñetøjẽ'e ũhasoma'ñe ũcu
 re'oja'che pa'ijũu. ¹² Mu'ure peore cho'ore'ochetu'ka
 Dioni masi cuasaku re'oja'che pa'ijũu, Repau pa'ichejare
 ai sani pasa chini. Jā'are chini Dios mu'ure chẽa

paamu. Mu'u Repau'te cuasaku jivosirumu pãi jainuko asaju'te mu'u Repau'te cuasaku jovski'e re'oja'che kua jñausi'kuam. ¹³ Icheja chejana'me cunatum pa'inare ũcuanukore pa'iche ĩsiku Dios asaku'te, ũcuachi'a Poncio Pilato'te chu'o re'oja'che i'kasi'ku Jesucristo asaku'te chũ'umu chu'u mu'ure ie chu'o: ¹⁴ Dios mu'ure jo'kasi'e jachama'ñe jmamakarujẽ'e cu'ache cho'oma'ñe pa'iu Maire Paaku Jesucristo jo'e rairumujatu'ka rua re'oja'che cho'oku pa'ijũ'u. ¹⁵ Repau'te raouarumuna Dios Jesucristo'te jo'e raoja'mu. Repau Dios Te'euji Re'oku Masiujeku ainarejẽ'e na'a rua Masiu'mu. Pãi chũ'unare ũsekuna repanare uache'te cu'ache cho'uju Repau ũsemamajñaruũchi'a cho'ome. ¹⁶ Repauchiaa'mu te'eu Si'arumu Pa'iku. ũcuauji ruarepa miaku ñacu'akuna pãi te'eujuẽ'e ñamanaa'me Repau'te. ũcuanuko cuhama'ñe si'arumu Repau'ni pojoju pa'ijũ'u. “Peore Masiu'mu mu'u”, chiiju pañu mai Repau'te. Jã'aja'ñe paau.

¹⁷ Pãi cheja pa'irumu kurinajeju pöse rua paanare, “Chekunare cuhema'ñe, kuri ai pa'ima'ñechi'a cuasaju, ‘Kurire paaku chu'u chiiche peore paaku'mu chu'u’, chiima'ñe pa'ijũ'u”, chiiu chũ'ujũ'u, Dios repanare cho'okaijachere pojoju na'a rua cuasaju paapu. Repau Dios maipi re'oja'che paapu chini mai chiiche peore karama'ñe ĩsiku'mu maire. ¹⁸ “Re'oja'chere si'arumu karama'ñe cho'uju pa'ijũ'u”, chiiu chũ'ujũ'u repanare, chekunani oiju repana paache'te ĩsiju paapu. ¹⁹ Jã'aja'ñe cho'uju pani Dios pa'ichejana ai sani repana cho'uju chi'isi'e re'oja'che karama'ñe paaju pojoju re'oja'che pa'ijanaa'me repana.

Timoteo'te cuhacho chũ'usi'ea'me

²⁰ Timoteo, Dios mu'ure jo'kasi'e re'oja'che cuhama'ñe che'choku pa'ijũ'u. Diore cuasamana peoche i'kachu'o, “Rua masina cuasache'me ie”, chiiche jorechu'o asama'ñe pa'ijũ'u. ²¹ Pãi te'ena Dios chu'o asasina repana jorena chu'vache'te asa chẽa Diore masi cuasache kuachu'o asacuheme chura.

Re'omu. Diopi re'oja'che cho'okaiu pau
musanukonare.

Pablo

Dios Chu'o Kuaphuro

Koreguaje: Dios Chu'o Kuaphuro New Testament

copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 4 Mar 2022

87a345ac-83c6-51ad-8750-17a703f38bcc